



Ingerlatseqatigiiffinni Namminersorlutik Oqartussanit pigineqartuni siulersuisuni siulittaasussanik toqqaasarneq pillugu apeqquteqaat aallaavigalugu oqallisigisassatut siunnersuut.

(Inatsisartunut ilaasortaq Jens Napätôk', Partii Naleraq)

Aallaqqaammut apeqquteqaat aallaavigalugu oqallisigisassatut siunnersuut manna pillugu Inatsisartunut ilaasortaq Jens Napätôk qutsavigerusupparput.

Demokraatiniit nuannaarutigaarput tulluusimaarutigalugulu namminersorlutik oqartussat suliffeqarfiutaani siulersuisuini nunaqqatigut amerlasuut issialersimammata. Tamatuma takutippaa inuiaqatigiittut eqqortup tungaanut ingerlaartugut ilinniartitaaneq, piginnaanerit aamma piginnaasat eqqarsaatigalugit.

Kikkulluunniit siulersuisuni ilaasortanngorsinnaanngillat. Sulliviit ataasiakkaat siulersuisuini suleqataassagaanni pisariaqarpoq immikkoortumut tulluuttunik piginnaaneqarnissaq. Tassunga atatillugu oqaatigisariaqarparput piginnaanerit pingaarnerummata sumi nunaqarnermut naleqqiulugu, pingaaruteqarluinnarmat namminersorlutik oqartussat suliffiutaasa sapinngisamik amerlanerpaanik piginnittunut iluanaartitsinissaat – tassa inuiaqatigiit kalaallinut.

Ilumoorpoq inuit nunami maani inunngorsimasut peroriartorsimasullu nunarput pillugu ilisimasaqarluarmata. Taamaattumunga iluarisimaaripput nunaqqatitta amerlasuut atorfinnut assigiinngitsunut inissisimammata. Kisianni sumiuussuseq apeqqutaanngilaq, tamanna naqissuseqqillara.

Eqqaamaqaakka ikinngutinut iluaqusiisarnerit, kammalaatersornerit qanigisanillu atorfinitsitsisarnerit inuiaqatigiinni initoorsuugallarmata. Aamma pisartut taamaattut akiorniarlugit Demokraatit pilersinneqarput. Tamakkua akiorniarlugit Partiitut ilaatigut pilersinneqarnikuuvugut, naammagittaalliortuinnartutut inissisimajunnaarluta piviusumik polikkerneq toqqammavigalugu ingerlatsilernikuuvugut, taamaakkaluortoq ikinngutinut iluaqusiisarnerit akerlerilluinnarpagut. Tamanna sananeqaatitsinniippoq.

Taamaattumik nuannaarutigaarput aamma partiit ikinngutinut iluaqusiisarnerit akerlerilersimammattigit. Taamaasilluta ilinniarluarsimasunik siulersuisuni ilaasortanngortitsisarnissaq qularnaarsinnaanngorparput toqqarneqartartunik piginnaaneqarnerat tunngavigalugu aamma pikkorissusaat tunngavilgalugu, taamaasilluta qularnaarsinnaanngorlugulu sulliviit sapinngisamik annerpaamik isertitaqartarsinnaanissaat. Allatut oqaatigalugu Demokraatiniit isumaqarpugut, inuit piukkunnarnerpaat taakkuussasut namminersorlutik oqartussat ingerlatseqatigiiffiisa siulersuisuini ilaasortassatut toqqarneqartartussat.

Ullumikkut annerusumik iliuseqarfigineqarsinnaasutut isigaarput nalilersuisarneq, tassa siulersuisuni ilaasortanik nalilersuisarnissaq ullumimut naleqqiullugu annerusumik. Inuit ilaasortaaffimminnut



tulluuppat? Ingerlatseqatigiiffimmik naleqarnerulersitsippat? Qanoq sivisutigisumik siulersuisuni
ilaasortaasoqartassava? Qanoq akulikitsigisumik nalilersuisoqartassava?

Taakkuupput uangut oqallinnermut ilanngukkusutagut.